

18

L A

1617

DISGRACE

(225)

du fauory dela

3850

Fortune.

Classé

PRESENTEE AV ROY.



Dup

A P A R I S.

Chez Ioseph Guerreau, demeurant de-

vant la grand porte du Pallais, pres


saint Bartheler, au Cha-

peau R, al.

1617.

AVEC PERMISSION.

38



L A

DISGRACE DV FAVORY

de la Fortune.



'I L est vray qu'il n'y aye rien de plus ferme, que l'inconstance : D'autant qu'elle perciste tousiours en son changement, qui peut-il auoir de plus asseuré que ce qui ne l'est pas ? Socrate definit le temps, (dont on ne peut arrester le poinct d'un instant en ses mouuemens, par la vitesse de son cours,) par le Symbole de la fermeté, parce qu'il est tousiours, sans estre iamais present. De sorte que ce qui est plus stable, c'est ce qui roule dans le decours de son neant, & par vn terme limittré de soy-mesme, passe de siecle en siecle pour aboutir à la fin. C'est aussi ceste Loy de la nature, que tout ce qui subsiste en estre, a son decroissement. Et m'esleuant plus haut ie diray; Qu'encores que le Soleil renouuelle ses ans &

A

la course, ses iours sont limitez dans le temps, lesquels accroissant son aage, Vieillissent son Regne, & leur lumiere sert de flambeau, pour guider ses pas, Vers l'eternité de son Occident. Quelle solidité de fondement peut-on donc concevoir sur la terre, si dans les Cieux mesme par vne reuolution essentiellement naturelle, Tout, va roulant à son decours: Les mortels, d'une apparence immortelle font vn monde de des-sains, leur donnent vne eternité, pour durer, mais n'estans pas à l'espreuue des coups du temps, leur hauteur penche en bas, & leur fondement est celuy de leur ruine.

La verité nous a fait voir, les excez de la grandeur, passer les extremitez de la bassesse; Ce Cresus, reduit à tel point de pauvreté, qu'il a rendu la misere plus miserable qu'elle n'estoit, luy donnant de nouveaux titres, en fin ce tout, amoindry tellement dans son rien, que ce qui n'a iamais esté se trouueroit plustost que son ombre. C'est ce fauory (mais iadis) qui esleué iusques au Ciel, sans toutesfois bouger de la terre: C'est en vn clain d'œil enseveli dans luy mesme cōme indigne d'un autre tombeau.

La fortune, ceste trompeuse Deesse, luy auoit presté la main pour l'esleuer à son throsne : mais son dernier degré a esté le premier de sa cheute, & on peut remarquer qu'il deuoit estre bien haut, puis qu'il est descendu si bas, ouy si bas, qu'on ne sçait ce qu'il est deuenu. Il apaisé comme vn torrent qui plein de violence disparoist en vn moment, & des'estre escoulé n'en reste pas seulement la souuenance. Nous voyons la rouë esbranlée, esleuee iusques en haut, & par vn contraire mouuemēt tomberauec plus de vitesse, & retourner dans le centre de son cours. C'est ceste rouë de la fortune, dont parle Origene, qui sans arrest nous porte au plus haut de son sommet, pour nous faire voir au plus bas du descours de son tour. Ainsi ceste marastre des hommes tient la vie & la mort empreinte dans son globe : Nous luy seruons de iouët, car comme vne onde flottante, elle nous fait voir tantost dessus, tantost dessous selon l'effect de son inconstance. Tellement que ses subiects ont tousiours pour ombre le dâger, cotroyant de prez leur precipice. Heureux donc celuy, qui sans autre fortune que celle de la naissance, vit & meurt en sa

premiere condition. C'est vn grād gain, que de ne faire point de perte, & vne grande fortune que de n'auoir point d'infortune. Qui est celuy qui voudroit estre cōblé d'vne extreme felicité, pour ressentir les plus poignāts traicts du malheur, & le plus chetif ce feroit tirer l'oreille, & croiroit estre coupable si l'on le forçoit à ceste iouyssance. Le miserable se console de soy mes me, Il mesprise les reuers de la fortune, & n'a prehēde que ce qu'il endure, les accidens ne luy font pas claigner les yeux, il voit en sa bassesse la cheute des autres & d'vn visage asseure, prend le temps comme il vient sans craindre de perdre, que ce que nul ne peut sauuer.

Pirovable est donc la condition de l'homme qui ne recognoissant d'autre Dieu que la Fortune, met son souuerain bien en ses faueurs, sans considerer que les mesmes degrez qui seruent à monter, ont le mesme vsage pour descendre, que tout ce qui tend haut, porte sa vifsee en bas pour faire agir son contraire: Et que le sommet, est, tousiours l'obiet de la descente, car d'y establir son trosne, la constance mesmes ne le peut pas, tant l'instabilité regne impe-

rieusement sur la terre, de sorte qu'aveuglé de trop de clarté, & esblouy de sa propre lumiere, d'un cœur prophane s'adore luy mesme, mais aussi ces Idolles sont les victimes, & apres seruy d'Autel, elles seruent d'offrande, pour satisfaction de leur crime.

Qu'on ne me parle plus ny de fortune, ny d'Amour, ce sont deux aveugles. L'un porte les fleches comme Tiran, l'autre le Globe, comme volage, & tous deux regnent egaleme[n]t dans le mōde, mais diuersement par leurs effects, bien que leurs autels ayent de mesmes sacrifices. Je m'estonne pourtant, que ces deitez imaginaires, ayent peu establir vn Empire sur la terre: & que sans les cognoistre on les adore, ce sōt des erreurs, mais si errantes dans le monde, que c'est sagesse, de faillir de la sorte, pourueu que la repentence ny succede pas, car tout bien, presuppose son mal, par vne loy inseparable de la nature.

Je croy que si ce Fauory commençoit à renaistre de ces cendres ou de son rien, qu'il feroit sa sepulture de son berceau, & qu'à peyne auroit-il veu le iour, que le iour ne le verroit plus: Laissons la memoire à celle des hommes, qu'il a eter-

nisee par la mort, ne l'ayant peu faire par la vie.

C'est à vous grand Roy, fils du plus grandde tous les Roys, à qui on doit desia dresser par aduance vn Temple à vos merites, & pour le dedier à l'honneur, le consacrer sous vostre nom, puisqu'il compréd en soy toute la gloire du monde. Ouy c'est à vous à qui se doit tout ce qui se peut rendre, pour celebrer vostre souuenir, qui ne s'oubliera iamais tant que la memoire viura sur la terre. On s'estonne, mais par admiration, que vos ieunes ans vieilliss de prudence, nous fassent recueillir en leur Aueil, tout ce qu'on scauroit esperer de leur Aueil, & que vostre courage en sa premiere vigueur, produise des effects sans exemple, & en vn triomphe si remarquable, que les plus grandes victoires cedent à ses Lauriers, Lauriers qui vous ostent desia le nom de fils de Mars, pour vous donner celuy de Mars mesme, & encore font-ils honteux de vous offrir si peu, puis que vous meritez dauantage. Car langue François n'est defectueuse qu'en ce qu'elle n'a point de termes assez exprès pour exprimer la moindre de vos loüanges, de sorte que pour vous louer

il faut dire, qu'on ne peut assez digne-
ment, & s'excuser pour n'estre coulpable,
deuant que l'entreprendre. Pour
moy iefçay ceste leçon par cœur de me-
taire pour parler de vous, puis que le si-
lence honore l'infinité, & qu'un excès
limite de soi mesme ne se peut exprimer
que par vn muet langage. Viuez donc
seul egal à vous grand Roy, il suffira de
dire vostre nom, pour publier vostre
gloire, & de vous nommer L O V Y S
tresiesme, pour vous appeller le plus par-
faict qui viue & qui viura dans la memoire
des hommes.

F I N,


PERMISSION.

IL est permis, à Ioseph Guerreau, Imprimeur &
Libraire à Paris, d'imprimer ou faire imprimer,
vendre & debiter La Dilgrace du Fauory de la
Fortune, Presentee au R O Y, Et deffence sont fai-
Eles à tous autres Libraires & Imprimeurs de l'im-
primer ou faire imprimer vendre & debiter sans le
consentement dudit Guerreau, à peine d'amende &
confiscation, suiuant ladite permission qui est du 27.
May. 1617.

Signé,

H. D. MESMES.

Et D. PARIS,



Digitized by the Internet Archive
in 2010 with funding from
University of Ottawa

